



*Minggu, 04 Oktober 2020*  
**Ogen: Jeremia 33:10-13**



**Tetap Rasa Lalap Keleng AteNa**



**K**ai si ipadanken Tuhan la pernah la itepatiNa. Si ibelaskenNa tuhu kerina. Taneh Juda ras Jerusalem si lenggo desken padang gurun, mulihi pagi jadi mbalmbal si meratah. Si ndube lanai lit i je kegeluhen, dungna pagi terbegi sora ersurak-surak, rende alu sora si meriah bagepe sora keriahen erdemu bayu. Bangsa Israel pagi rende ersurak ngataken bujur dengen maba persembahen ku rumah Tuhan Si Badai. Puji-pujinna man Tuhan erkiteken igejapna keleng ate Tuhan tetap rasa lalap, amin pe ia iukum Tuhan tapi labo rasa lalap, lit denga dalin mulih ku Tuhan sabap Tuhan ersikap lalap ngalemi bangsaNa. Kai si ibahan Tuhan enda min nuate jadi kesaksin bangsa Israel man doni enda kerna biak Dibata si erkekelengen e. Janah Dibata pe ersura-sura gelah arah bangsaNa itandai doni enda Dibata si erkuasa.

Genduari kita kap bangsa Tuhan e. Seh nge man banta padan keleng ate e. Amin gundari mberat si akap ndalani kegeluhen e erkiteken masa pandemi Corona si lenga erkedungen. Dampakna mbelin kal ku bas perekonomianta, kesehaten ras pendidikan anak-anakta. Banci saja kita gundari erdalan desken mentasi padang gurun. Tapi inget maka i je pe Dibata ras kita. IA ngasup erbahansa keguluten salih jadi keriahen. Labo rasa lalap kita bas padang gurun e. Seh pagi paksana keriahen jadi sikerajagenta, i je pagi terbegi sora surak si meriah, dengen kerina ngataken bujur man Tuhan.

Gundari nari, sipenanam-nanamlah uga belinna keleng ate Tuhan e, sabap labo pagi entah kedun isehkenna keleng ateNa, tapi gundari nari. Sabap IA Dibata si tetap rasa lalap erkuasa dengen erpadan nehken kekelengen si mbelin man anak-anakNa. Ula ragu! Sabap labo ia pernah lupa nehi padanNa.

✍ IA Dibata si tetap nginget padanNa